

新昌縣志卷之四

知縣田瑄纂

風俗志 習尚 士風 閨範 冠 婚

喪 祭 歲時 宴飲 服飾

宮室 貴賤

記謂廣谷大川異制民生其間異俗盖俗亦囿於地哉新地狹隘有魏之遺風其族古而多賢有先哲之餘化故民俗以美稱而今有不美者則俗之變然耳備錄之以俟觀省焉志風俗

習尚 邑鉅族多聚城市或散處於鄉村就田業大

新昌縣志卷之四

一

約安於土著不利遠行農安本業不末作俗務勤儉尚禮文宗族長幼有序卑幼雖貴富不敢與尊長齒民知學雖輿隸卒圉亦頗識字几下役皆爲之獨不爲轎夫舊族故家有祖遺田宅至數百年不易主者然兄弟多好異財別籍尚氣好鬪健訟輕生吝財而近時賭博搶火之風任俠講張之習抑尤盛焉稍有讐怨即相與出感言或興謠或造謗粘於墻置於竹箒暗投官司者不可禁也

士風 國初聘賢良徵耆舊科第駢登士皆尚德行

矜名節不入酒肆不履貨市不入公門不游花柳之場山林隱逸多以詩文相高嗣而文教日興賢才輩出家詩書而戶禮樂他郡邑學者望風慕效於歟休哉今之士風漸壞矣大率負氣沾沾足已耻師人甚或悖理傷倫傲上凌下盖亦百之一二也

閨範名門右族閨門嚴整非至親不相見街市店肆中不見婦女往來開張貿易者絕無焉故家夫亡婦耻再醮羞出官不爲尼姑公庭中絕少鼠雀之訟然於上元清明踏青之遊亦頗盛焉

家殷富多畜侍婢與通房士民槩以媵女爲妾主母徃徃妬而虐之生女多沉而不育盖恐厚奩之廢家也亦敝俗哉

剋禮剋禮不行久矣男子年十六以上垂髮總角長而剋多於冬至或正旦加巾網于首拜天地祖宗尊長如斯而已邑員外郎俞振強剋其子始行三加禮其子邦時輩亦遵之今仕夫之家亦間有行之者

婚禮故家巨族爲婚必擇門地相埒者爲之小家雖富不與焉其婚娶不行六禮始通媒討年帖

婿家父兄盛衣冠詣女家拜謝或用銀牌寫允許二字爲定其禮最簡續後具猪鷺茶餅之類饋送繼行納幣禮不論財賄娶之日用樂婦伴送行禮以樂婦扶掖成婚雜用踏藁牽紅傳席交盃諸儀拜公姑而以次及其家衆賓客翼日獻鞋被於公姑三日廟見仍拜茶於族長焉邑封君呂世良命其子呂光洵始行親迎禮而尚書潘晟爲諸生時亦行之庠生俞邦時聘娶諸弟男婦一遵家禮今諸姓亦多有繼之者

喪禮初喪於死者脚下燒紙錢少許名曰起脚又

買淨水湯浴朝夕哭奠雜用酒肉紙錢親戚往弔亦如之其餘大率用文公家禮惟不行小斂不用布絞之制稍異耳棺柩富室宦家用沙木爲最厚衣衾亦稱是中家棺用杉松至下家則以簿爲其道爾其墳塋或砌磚爲槨或挖土爲壙或堆土而壅之亦惟稱家之有無焉朝夕哭奠外又有七七之期加厚奠百日卒哭先輩不用浮屠近亦有用者孝子既卒哭舍苴經更用細麻巾服出謝弔客小祥大祥禫服頗皆近古但溺於陰陽家而惑於堪輿之說每每停柩不

墓有至二三十年者

祭禮祭用四仲分至日世家大率遵用文公家禮小戶多不能然止列羹飯香燭家長一人口請祖先而已忌日必素服哭祭終身不廢清明有墓祭用牲醴先輩不諂神佞佛不祭他鬼近亦有之民間疾病多詣城隍廟張侯陳老太公土穀等祠祈禱繼設戲臺酒席酬謝或以三牲賽之其始祖祠堂以冬至日祀之古禮也但宗法未行耳

歲時正旦男女拜天地祖宗尊長畢出外沿門拜

鄉里親戚然至人皆不出迎見客元宵各廟保扮燈及故事於正月十三日盛迎遠近鄉村男女及隣邑皆聚觀近二十年来稍息元宵街市猶張燈謂之歡門男女出遊賞鄉村迎神賽會
有花迎附近男女聚觀清明節家家門戶插柳取菁作糍獻先人并自食立夏炙昌魚薤菜端午繫五色線飲雄黃菖蒲酒佩香囊艾虎七夕女子設香醪迎織女乞巧煮槿湯沐髮中秋夜賞月啣月餅重陽登高採菊飲茱萸酒冬至爲米團服食且相餽遺除夜飾鬼容逐難家家爆

竹群坐歡飲謂之分歲設鍾馗桃符于門以却鬼街市取帳目人往來誼譁達旦乃已

宴飲先輩宴饗儉素蔬果之外設饌數味皆土物器用瓦漆酒五七行而止今漸奢宦家貴族有五乾五濕攢碟勸盤設看卓然穀不離烟鮮皆土儀也味不甚調侑客多動鼓吹作雜劇頗爲紛華其細民設席各從土俗牲體或不去其毛其味尤苦澁至於食店所製酒肉麵食之類多不精潔惟過客及有事於官府者入焉其厨役所整官府飲食另爲一格式與府城大不同其

物餽而味淡每爲上官過客所嫌屢省之不變也

服飾成化以前平民不論貧富皆遵國制頂平定巾衣青直身穿皮靴鞋極儉素後漸侈士夫裘冠博帶而稍知書爲儒童者亦方巾綵履色衣富室子弟或僭服之小民儉嗇惟粗布白衣而已至無喪亦服孝衣帽盈巷滿街即帽舖亦惟製白巾帽絕不見有青色者人皆買之問之云爲其價廉而便益也惟役於官者不服之

宮室城中富宦之家多高堂廣廈雜用諸色木植

週圍繞以磚牆簷阿警革丹艷相望村鄉多茅房土屋僅庇風雨其如城中之制者僅僅一二而已

貴賤詩禮相傳閱素著者爲貴族小姓孤立雖起家致富不得抗禮貴宦回家乘密轎不列儀仗其主僕之分亦嚴外縣流寓住種者爲逃戶不得與齊民齒又有樂戶十餘姓業鼓吹歌舞役自相婚配男婦多聽大家使令凡飲宴率用之行酒游俠之徒多聚飲於其家使其女供歌唱或宿卧於其房不拒也不如意則唾罵鞭撻

之不敢逆近亦有欲盟其黨以犯良者是或有以陰啓之也其俗惟衣食於歌唱遇慶賀則需酒食遇收成則求米穀富室子或資以財帛有溺而不反則亡身敗家因之矣亦邑之敝風也

風俗總論

論曰按官制載新昌民淳事簡山谷多盜此風俗之大較也使能保其淳安其簡而以非爲相戒勉焉寧不熙熙然稱盛治哉顧今民日偽而淳者以漓事日爭而簡者以繁游俠博塞姦宄講張雖屢省之不戢焉風會之流

可慮也然風者上行下效之謂也俗者衆志
安定之謂也脩其教不易其俗齊其政不易
其宜維在司風俗者審所尚而已

縣志四卷終